

Na caminda pa e creacion di e 'Green Faculty'

TNO Caribbean y Universidad di Aruba ta formalisa relacion



E firmanan a hacie oficial, sinembargo, e cooperacion entre Universidad di Aruba (UA) y TNO Caribbean de facto tabata estableci desde cu TNO a establece un sucursal na Aruba.

Director di TNO Caribbean Jan Ebbing y Rector Ad Interim di UA Luciano Milliard a firma un Memorandum of Understanding, un MoU, durante e prome simposio di TNO Caribbean, cu a tene recientemente na Aula di UA. E ponemento di firma a seya un colaboracion natural dirigi na solidifica e fundeshi pa e meta di Aruba bira un sociedad sostenibel en general y e creacion di un di cinco facultad, e 'Green Faculty' na UA en particular.

Sr. Jan Ebbing na e ocasion a bisa cu u pa logra e Green Faculty, e ta necesario pa por conta cu partnernan di confia. TNO ta un institucion cu pa medio di investigacion ta aplica tecnologia nobo den practica y UA, como un partner di confia ta crea e generacion nobo di mentenan briyante cu por yuda cu e retonan di futuro. "Ami semper ta buscando hende cu mi por confia y kier traha cu ne," Director di TNO Caribbean Ebbing a agrega.

E MoU no tabata algo realmente necesario segun Patrick Arens, Director Financiero di UA, mirando cu ya caba TNO Caribbean y UA ta trahando hunto riba diferente proyecto. "E asociacion entre TNO Caribbean y UA ta un forma masha natural, organico di traha cu otro. Nos mester di TNO pa yuda nos diseña programanan y haci investigacionnan necesario." TNO Caribbean tambe a desaroya su mes den un partner valioso pa UA, Arens a agrega.

Ruurd Schoolderman di TNO Caribbean tabata na principio di e proceso pa inicia e di cinco facultad na

UA, y a subraya cu esaki tabata un obhetivo di TNO for di momento cu a establece un sucursal na Aruba cuater aña pasa. "Cosnan asina aki ta tuma tempo pa madura," Schoolderman a bisa, referiendo na diferente reto cu ainda mester surpasa pa asina e Green Faculty por habri su portanan.

E reto mas grandi tabata e finanza rekeri. E idea original pa gobierno absorba e costonan a keda modifica pa acomoda e realidad financiero di Aruba y UA, y esey a exige creatividad di parti di TNO Caribbean y e instituto academico local.

"Nos (TNO y UA) a acerca e proyecto un tiki diferente na un di dos ocasion. Nos a mira e proyecto for di un prospecto di un Triple Helix," Arens a splica. E acercamento Triple Helix ta encera un esfuerso conhunto for di industria, sector educativo y gobierno. Y ta for di reunionnan entre tur actor di e sectornan aki a sali un plan nobo pa un programa na nivel Bachelor's cu ta enfoca riba sostenibilidad y energia berde. E programa aki mes lo mester keda sosteni financieramente pa medio di oferta di programanan di desaroyo profesional pa industria y gobierno, como tal ta habri e espacio pa educacion continuo den e sectornan aki. Ademá, e meta di e facultad nobo ta pa ofrece programanan durante periodonan di zomer y winter, dirigi na studiantenan di e region y Aruba, como tambe profesionalnan di region cu kier mehora nan conocimiento y habilidadnan riba e tereno di sostenibilidad. Banda di e programa di Green Faculty, lo tin un centro di investigacion unda Aruba lo fungi como un laboratorio bibe pa concepcion y tecnologianan di sostenibilidad, "pa asina mira con nan por cu e condicionnan cu nos tin na Aruba." Ta e programanan aki lo yuda acumula e fondonan necesario pa carga e



estudio Bachelor's di e Green Faculty.

Ademá di TNO, UA ta conta cu partnernan cu ta inclui Arizona State University, University College Utrecht y University of South Carolina, como tambe otronan cu ta asisti den e desaroyo di e Green Faculty. Gobierno di Aruba ta den proceso pa aplica pa e fondonan necesario pa adkeri e facilidadnan nobo y

necesario pa ubica e facultad nobo. E fondonan aki ya ta destina pa e proyecto y ta bin di e Fondo di Desaroyo Europeo. E perspectiva positivo ta cu e fondonan aki lo ta disponibel pa 2016, cu ta nifica cu e facultad nobo lo por habri su porta pa studiantenan na 2017.

"E ta bay tuma un esfuerso duradero di tur actor envolvi pa keda pusha e idea aki di-

lanti," Schoolderman a conclui y door di haci esaki, e Green Faculty lo bira un forza importante "pa practicanan sostenibel durante henter e region Caribense," den palabranan di Rector ad Interim Luciano Milliard.

Pa mas informacion, tuma contacto cu Ruurd Schoolderman, BRIDGE Project Implementation Manager, na ruurd.schoolderman@tno.nl, telefon (218) 251-6174; of Jan Ebbing, Director TNO Caribbean na jan.ebbing@tno.nl, telefon (297)-5823100.

Potretnan ta ilustra Director di TNO Caribbean Jan Ebbing y Rector Ad Interim di Universidad di Aruba Luciano Milliard poniendo nan firma pa e MoU, y ambos seyando e colaboracion. □